



REPUBLIKA E SHQIPËRISË  
KOMISIONERI PËR TË DREJTEN E INFORMIMIT DHE MBROJTJEN  
E TË DHËNAVE PERSONALE

Nr. 532/5 Prot.

Tiranë, më 29/06/2015

V E N D I M

Nr. 34, datë 29/06/2015

Në mbështetje të neneve 29, 30 dhe 32 të Ligjit nr. 9887, datë 10/03/2008 "Për Mbrojtjen e të Dhënave Personale" i ndryshuar, Ligjit nr. 8485, datë 12/05/1999 "Kodi i Procedurave Administrative të Republikës së Shqipërisë", të procesverbalit të hetimit administrativ dhe provave të administruara në ngarkim të kontrolluesit "New Call Easy" sh.p.k.,

V Ë R E J S E :

Në zbatim të Urdhrit nr. 128 datë 01/06/2015, ka filluar hetimi administrativ pranë subjektit kontrollues "New Call Easy" sh.p.k. me objekt: Plotësimi i detyrimit për njoftim (neni 21 i Ligjit nr. 9887 dt. 10/03/2008 "Për Mbrojtjen e të Dhënave Personale" i ndryshuar).

Në datën 04/06/2015 ora 09:00, grupi i hetimit administrativ ka marrë kontakt me supervisorin e kontrolluesit z. \_\_\_\_\_ i cili ka marrë përsipër të njoftojë administratorin e subjektit "New Call Easy" dhe njëkohësisht është konfirmuar takimi për orën 10:00 të së njëjtës ditë. Ndonëse grupi i kontrollit u paraqit në orën e caktuar, përsëri subjekti nën kontroll shmangu takimin dhe konfirmoi një orë tjetër takimi në orën 14:00. Grupi i kontrollit u paraqit sërish në orën 14:00 dhe konstatoi se ambienti në të cilin subjekti "New Call Easy" ushtron aktivitet ishte i mbyllur dhe nuk kishte punonjës prezent.

Për të zbatuar Urdhrin, grupi i kontrollit shkoi përsëri më datë 16/06/2015 dhe kërkoi të kontaktonte me administratorin por përsëri nuk u mundësua një gjë e tillë. Në këto kushte u mbajt procesverbali i firmosur nga supervisorin \_\_\_\_\_, duke ju bërë me dije që çështja do të kalonte në seancë dëgjimore.

Në seancën dëgjimore të datës 29/06/2015 ora 12:20, ndonëse ishte marrë njoftim zyrtar i nënshkruar nga z. \_\_\_\_\_, përsëri kontrolluesi "New Call Easy" nuk u paraqit duke treguar kështu mungesë të theksuar bashkëpunimi.

Nga ana e grupit të kontrollit, është mbajtur procesverbali i konstatimit, në momentin e ushtrimit të Kontrollit Administrativ, në ambientet e kontrolluesit.

Në respektim të së drejtës për t'u dëgjuar si dhe në zbatim të neneve 93-96 të ligjit nr. 8485, datë 12/05/1999 "*Kodi i Procedurave Administrative të Republikës së Shqipërisë*", me shkresën nr. 532/2 prot. dt. 17/06/2015 është njoftuar kontrolluesi "*New Call Easy*" sh.p.k. për tu paraqitur pranë ambienteve të zyrës së Komisionerit më datë 29/06/2015 ora 12:20, për tu dëgjuar në lidhje me pretendimet e mundshme të tij.

Kontrolluesi "*New Call Easy*" sh.p.k nuk është paraqitur në datën dhe orën e përcaktuar dhe njoftuar për seancën dëgjimore, vërtetuar kjo nga verifikimi i bërë në protokollin e institucionit tonë.

Nga verifikimi i bërë pranë regjistrit elektronik të K.D.I.M.Dh.P.-së, u konstatua se ky kontrollues, nuk e ka përmbushur detyrimin për njoftim deri në datën e përcaktuar për seancën dëgjimore.

Sipas Ligjit nr.9887, datë 10/03/2008, "*Për mbrojtjen e të dhënave personale*" i ndryshuar, kontrolluesit kanë përgjegjësinë për përpunimin e të dhënave personale të subjekteve të të dhënave e për pasojë, detyrimin e zbatimit e të gjitha kërkesave të këtij ligji, në mënyrë të veçantë, atë të detyrimit që parashikon paragrafi 1 i nenit 21: "*...Çdo kontrollues duhet të njoftojë komisionerin për përpunimin e të dhënave personale, për të cilat është përgjegjës. Njoftimi duhet të bëhet para se kontrolluesi të përpunojë të dhënat për herë të parë ose kur kërkohet ndryshimi i gjendjes së njoftimit të përpunimit, sipas nenit 22 të këtij ligj*".

Bazuar në nenin 25/1 të ligjit, kontrolluesi nuk mund të fillojë përpunimin e të dhënave personale pa njoftuar më parë Zyrën e Komisionerit. Në këto kushte, konsiderohet shkelje serioze përpunimi i të dhënave personale, pa njoftuar dhe pa u regjistruar më parë në Regjistrin Qëndror të subjekteve kontrolluese, të administruar nga Zyra e Komisionerit.

Si përfundim, shkelja e konstatuar gjatë ushtrimit të kontrollit administrativ në kuptim të nenit 39/1 shkronja "d" të Ligjit nr. 9887 datë 10/03/2008 "*Për Mbrojtjen e të Dhënave Personale*" i ndryshuar, përbën "*kundërvajtje administrative*" dhe dënohet me gjobë.

Në dhënien e masës së gjobës, Zyra e Komisionerit ka parasysh faktin se shkelja e konstatuar është serioze dhe qëndrimi i mbajtur nga ana e subjektit kontrollues është mosbashkëpunues. Shkeljet çënojnë të drejtën e subjekteve të të dhënave për tu informuar se kush ia përpunon të dhënat personale, qëllimin e përpunimit të tyre si dhe të drejtën e Komisionerit për të qenë në çdo moment i informuar, si garant i mbrojtjes së ligjit.

#### **PËR KËTO ARSYE :**

Në zbatim të neneve 21, 30, 31, 32/1, 39/1/d, 39/2, 40 dhe 41 të Ligjit nr. 9887, datë 10/03/2008 "*Për Mbrojtjen e të Dhënave Personale*" i ndryshuar,



## V E N D O S A :

1. Dënimin e kontrolluesit "New Call Easy" sh.p.k me gjobë në vlerën 400.000 (katërqindmijë) lekë.
2. Plotësimin e detyrimit për njoftim pranë Zyrës së Komisionerit brenda 5 (pesë) ditëve nga data e njoftimit të këtij vendimi.
3. Gjoha arkëtohet nga kundërvajtësi në Buxhetin e Shtetit, jo më vonë se 30 (tridhjetë) ditë nga komunikimi i këtij vendimi. Me kalimin e këtij afati, ky vendim kthehet në titull ekzekutiv dhe ekzekutohet në mënyre të detyrueshme nga zyra e përmbarimit.
4. Kundër këtij vendimi mund të bëhet ankim në gjykatën administrative kompetente, në afatet dhe sipas procedurave që rregullojnë gjykimin admiminstrativ, në përputhje me nenin 40 të Ligjit nr. 9887, datë 10/03/2008 "Për Mbrojtjen e të Dhënave Personale" i ndryshuar.

Ky vendim u shpall sot në 29/06/2015

